

陳學士吟窓雜錄

陳學士吟窓雜卷二十二

歷代吟譜

陳

後主

常使張貴妃等八人夾坐江攄等十人爲狎客相贈
答其曲有玉樹後庭花臨春樂等其略曰

璧月之夜夜滿瓊樹朝朝新後從隋文帝東巡登芒山
侍飲賦詩曰

日月光天德山河壯帝居

文帝曰此敗豈不由詩酒

蕭允

字叔优蔡徵誦允詩以對後主嘆賞

周洪正

字思行於獄中上武帝講武詩降勅原罪

周弘讓

性簡素博學多通

徐陵

字孝穆寶誌摩其頂曰天上石麒麟也及長博涉史籍日有青精時人以爲聰慧之相

江惣

字惣持作述懷詩帝嗟賞任宰相不持政務但與後主爲狎客由是國政日頽

姚察

字伯審十二歲能屬文嘗製登宮城五百字詩

陸瓊

字伯玉六歲爲五言頗有詞采

謝貞

字元正八歲嘗爲春日閑居王筠竒之謂曰至如風定花猶落乃追步惠連矣

岑德潤

字敬之位中軍吳興王記室

徐伯陽

字隱忍遊宴賦詩勒成卷軸伯陽爲其集序行於世

蕭詮

詠巫山高云巫山峽映空高高望未窮

賀循

詠李廣云李廣欲宣威其赴薊門圍

劉剛

詠蟬詩云聲流上林夜影入侍臣冠

張正見

字見贖五言詩尤善大行於世

阮卓

善談尤工五言詩

陰鏗

字子堅五歲能誦詩賦日千言尤善五言詩為當時所重賦新成安宮援筆便就

孔範

字法言善五言詩後主尤見親愛

徐孝克

陵之第三第也作栖霞寺詩曰
戒壇青石路靈相紫金身

沈炯

字孔明從遊中天寺應令曰

福界新開草名僧共下筵

遊明慶寺詩曰

鷲嶺三層塔菴園一講堂

後魏

孝文帝

好讀書手不釋卷好爲文章詩賦銘頌任輿而作有
大手筆馬上口授不改一字

元成

字文若奏郊廟歌詞時稱其美

元暉業

位太尉嘗有詩曰

昔居王道泰濟濟富羣英

元澄

字道鏡爲七言連韻與孝文往復賭賽

元延明

所著詩賦等三百餘篇

元勰

字彥和從幸代都作詩十步而成曰

問松林松林經幾冬山川何如昔風雲與古同

元瑜

字宣德好文章頗著詩賦

崔宏

字元伯少有雋才號曰神童避地江南作詩以自傷而不行於蓋懼罪也

宋道璵

坐王瑜反得罪作詩及挽歌詞寄親朋以見冤痛

刁雍

字叔和性寬柔好尚文典手不釋書明敏多智凡所作詩賦等有百餘篇

陸恭之

與兄曄並有時譽所著文章詩賦凡千餘篇

盧懷仁

字子友所著詩賦等二萬言

盧元明

字幼章涉歷群書永熙末居緱山乃作幽居賦

高允

字伯恭曾作塞上公詩後乃著告老詩

李旻

字季節少好學自簡詩賦二十四首謂之達生大人集

李騫

字希義嘗贈親友盧元明魏收詩

游肇

字伯始傳綜經史詩賦表啓凡七十五篇

趙逸

字思羣性好墳典凡所著述詩賦銘頌五十餘篇

胡叟

字綸許好屬文既善典雅之詞又工鄙俗之句

鄭道昭

字希伯少好學綜覽群言好爲詩賦凡數十篇

裴敬憲

字孝虞少有志行博學才清淡於榮利風氣俊遠五
言之作獨擅於時聲名甚重後進咸宗暮之

韓顯宗

字茂親剛直能面折廷諍亦有才學

常景

字永昌少聰敏及長有才思雅好文章明帝行講學之禮於國子寺詔有官作釋奠詩以景作爲美經涉山水帳然懷古乃擬劉琨扶風歌十二首

邢晏

字幼平美風儀雅好文詠

李彪

字道固好學不倦爲十二次詩

崔光

字長仁孝文曰今日之文宗也持節陝西賦詩二十八篇爲五韻詩以贈李彪

梁祐

常與朝廷名賢泛舟洛水以詩酒自娛

鹿念

字末吉嘗賦五言詩曰

嶧山萬丈樹彫鏤作琵琶

馮元興

字子盛爲浮萍詩以自喻曰

有草生碧池無根水上蕩

祖瑩

字元珎八歲能誦詩書十二爲中書學生以文學見重嘗語人云文章須自出機杼成一家風骨何能共人同生活也蓋譏世人好竊他人文以爲己用

張始均

字子衡端潔好學著詩賦數十篇

温子昇

字鵬舉初受學於崔靈恩文章清婉梁武稱之曰曹植陵機復生於北土恨我辭人數窮百六

北齊

後主

頗好詠詩救屏風錄近世輕艷諸詩以充圖畫

崔陵

字長儒有文學偉風貌寡言辭

崔瞻

字彥通才學風流爲後來之秀盧思道曰崔瞻文辭之美實有可稱但舉世重其風流所以才華見沒

崔仲文

有文學爲觀射詩十韻揀筆立成

王昕

字元景有文集二十卷

王暕

字叔朗諱晉詞賦詩曰

日落應歸去魚鳥見留連

陸卬

字雲駒齊之郊廟諸歌多卬所制

盧思道

字子行爲五言詩見意世以爲工大慈照寺曰

玄風冠東戶內範軼西陵

明皇自蜀回登勤政樓歌曰庭前琪樹

已堪攀塞北征人竟未還此思道歌也

鄭元禮

字文規少好學愛文藻有名望

裴澤

頗有文學誅石榴詩微以託意

裴讓之

字士禮少好學有文省中語曰

能賦能詩裴讓之

裴訥之

字士言純謹有局量

楊愔

字遵彥所著詩賦甚多門生鳩集所得者萬餘言

劉逖

字子長卷不離手頗工詩詠

邢邵

字子才十歲能屬文雅有才思年未二十名動衣冠
每一文出京師爲之紙貴

陽固

字敬安年二十六始折節好學免官閉門自守著演
頌賦以明幽微通塞之事

陽休之

字子烈好學愛文藻時人爲之語曰

能賦能詩陽休之

祖珽

字孝微和公主遠嫁詩二首大爲時人傳詠

魏收

字伯起少機警不持細行魏帝季秋大射收詩末句云天書檄建鄴折簡召長安文帝壯之

荀仲

字士高李暉死仲舉因過其宅爲五言詩十六韻以傷之因甚悲切世稱其美

蕭愨

字仁祖工於詩曾秋夜賦韻其兩句云

芙蓉露下泣楊柳月中踈

馬子結

魏太 中入洛父祖俱清宦

房彥詢

所贈江撻詩今見撻集

後周

明帝

博覽群書善屬文於麟趾殿賦詩曰

玉燭調元氣金輿歷舊宮

蕭撝

字智遐所著詩賦雜文數萬言行於世

蕭圓肅

字明恭風度純雅敏而好學為文海四十卷

唐令則

往好篇章兼解音律文多輕艷為時人所傳

申徽

字亾儀為襄州刺史及還題詩於清水亭

劉璠

字寶義少好讀書兼善文筆梁室亂乃喟然賦詩以見志其末章曰

隨會平五室夷吾匡霸功

王褒

字子深七歲能屬文曾作燕歌妙盡塞北寒苦之言

庾信

字子山每有一文都下莫不傳誦杜甫詠懷古跡詩曰庾信平生最蕭瑟暮年詩賦動江關

劉琰

聞故人入鄴不勝泣爲詩贈之曰

聞道漳濱信依然憶舊居又贈司馬幼之曰
白帝望青衣路長音信稀

隋

煬帝

善屬文自京師如東都至長樂宮賦詩曰
徒有歸飛心無復因風力又幸江東作詩曰
鳥聲爭勸酒梅花笑殺人

于宣敏

字仲達每懷靜退著述志賦以見志

李德林

字公輔善屬文所撰文集八十卷

牛弘

字里仁煬帝即位嘗賜弘詩曰
晉家山吏部魏世虞尚書

楊素

子處道嘗以五言詩七百字寄薛道衡詞氣穎拔風
韻秀上爲一時盛作

李元操

名孝貞兄弟並以文學自達

薛道衡

字文卿六歲而孤上鳳林寺詩曰
淨土連幽谷寶塔對危峯

又聘陳爲詩曰

人歸落鴈後思發在花前

又詩曰

暗室懸蛛網空梁落燕泥

煬帝忌其能比死曰更能道箇空梁落
燕泥否翠以羽自害可不戒哉

薛孺

清貞孤介不交流俗涉歷經史有才思

明克讓

字弘道善談論朱异令賦竹曰

非君多愛賞誰貴此真心

明少逸

博涉羣書有詞藻拜中厥子

辛德源

字孝基沉靜好學不得志著幽居賦以見志

虞世基

字懋世博學有高才嘗爲五言詩以見情文理淒切世以爲工作者無不吟詠

李諤

字士恢能屬文文帝時上書曰自魏之三祖更尚文詞江左齊梁其弊彌甚連篇累牘不出月露之形積染盈箱惟是風雲之狀指儒素爲古拙用詞賦爲摠

鮑宏

字潤身七歲而孤年十二歲嘗屬文嘗和湘東王繹詩嗟賞不已後爵爲公

李密

字法主才兼文武不得志爲五言詩曰
金風蕩初節玉露凋晚林

劉臻

字宣摯年十八舉秀才位至三司

諸葛穎

十八能屬文煬帝嘗賜穎詩其卒章曰

參翰長洲苑侍講肅成

孫萬壽

字仙期善屬文不復以志爲詩贈京邑知友曰

賈誼長沙國屈平湘水濱

王胄

字承基贈顯法師詩曰

客行萬餘里渺然蒼海上

煬帝爲燕歌行王胄獨不下帝帝銜之
竟坐誅帝誦其警句曰庭草無人隨意
綠復能作此耶

王脊

字元恭博學多通少有盛名於江左

庾自直

少好學於五言詩尤善

常德志

爲五言詩辭理悲壯爲時人所重

陳學士吟窓雜錄卷二十二

陳學士吟窓雜錄卷二十三

歷代吟譜

唐

太宗

向學多屬文賦詩天格瞻麗賜蕭瑀詩曰
疾風知勁草版蕩識誠臣

帝宴積翠池帝分得尚書詩曰

日晏披百篇臨燈披五典

高宗

因賦七言詩效栢梁體侍臣並和

中宗

帝有所感賜詩學士皆屬和當時人所歆慕

肅宗

嘗製王靈芝詩

德宗

宴曲江自爲詩勅宰相擇文人賡和

敬宗

善爲歌詩

文宗

賜裴度詩曰汪想待元老識君恨不早

宣宗

白居易卒帝以詩弔之曰

綴玉聯珠六十年誰於冥路作詩仙

陳子昂

字伯玉初爲感遇詩三十八章王適曰是必爲海內
文宗

杜審言

字必簡恃才高以傲世嘗語人曰吾文章當得屈宋
作衙官吾筆當得王羲之北西

杜甫

字子美季豳竒其才元稹謂詩人以來未有如子美
者元微之曰余讀詩至子美而知小大之有所揔焉
王禹玉曰杜子美詩之傑也

永叔曰風雅久寂寞吾思見其人

尹師魯堂論子美作詩深音格高思深

凡詠物寄贈率皆託意於物

詩曰

庭前有白露暗滿菊花園

謂朝廷德澤尚及小人

詩曰

午女年年渡何曾風浪生

謂賢君世世爲治何嘗致此播遷之風浪

螢火詩

下月清霜重飄零何處歸

謂祿山終被天誅也

秦州雜詩

卑馬何蕭索門前有草長

傷君弱臣強也

山雲低度墻鷓鴣窺淺井

是賢人失職也

簷雨亂淋慢蚯蚓上深堂

是小人在朝也

詩曰

江湖多自鳥天地有青蠅

此喻君子小人之事也

詩曰

老馬病知道

君子雖處窮困尚遵禮義也

蒼鷹飢着人

小人居貧賤即怨懟以害人也

杜鵑詩

西川有杜鵑東川無杜鵑

宋叔云譏東川涪南下不能奉上無尊卑之禮梅聖俞論子美性剛毅不屈伏人自負甚厚然命不偶時故窮悴戚戚雖不得志標製尤高

百舌詩

過時如發口君側有讒人

山谷云讀周書月令云反舌有聲佞人在側

李白

字太白李陽水曰其言多似天仙之辭

盧黃門云文章橫被六合力敵造化殷璠云文章縱逸奇之又奇

賀知章號為謫仙

杜子美詩曰筆落驚風雨詩成泣鬼神明皇於沉香亭宣白進清平調辭三章真妃笑飲歌辭意甚厚高力士以脫靴為耻擯飛燕措妃子上三欲命白官卒為宮中所擇而止

白有詩曰

吟詩作賦比窓裏萬言不及一杯水

劉夢得詩曰

詩稱國手徒為爾命壓人頭不柰何

魏徵

太宗宴羣臣積翠池徵詩曰
終藉叔孫禮方知皇帝尊

太宗曰徵言未嘗不約我以禮

杜淹

字執政嘗侍宴賦詩尤工賜銀鍾

虞世南

字伯施辭章清勁帝嘗作宮體詩使和世南曰聖作
誠工然體非雅正不敢奉詔

李百藥

字重規太宗嘗製帝京篇命百藥並作上歎其上

褚亮

字希明後主召見使賦詩江揔諸詞人在席皆服其整
崔信明

鄭世翼遇信明江中謂曰聞公有楓落吳江吟願見
其餘信明欣然出衆篇覽未終授諸水

上官儀

字游韶工詩人多效之謂上官體

楊師道

字景猷工詩每與名士燕集歌詠自適

王勃

字子安嘗登蒼梧山賦詩見情與楊盧駱皆以文章
齊名天下號四傑

楊炯

舉神童授校書郎

盧照隣

字昇之著五悲文以自明

駱賓王

七歲能賦詩嘗作帝京篇天下以爲絕唱

宋之問

字延清武后游洛南龍門詔從臣賦詩之問詩曰林
下天香七寶臺山中春酒萬年盃

游靈隱寺詩曰

樓觀滄海日門聽浙江潮

沈佺期

字雲卿善屬文尤善七言詩與之問齊名時稱沈宋

魏知古

爲侍中從獵渭川獻詩以諷手詔褒答詩曰
嘗聞夏太康五弟訓禽荒

李日知

爲御史安樂公主館成中宗臨幸從官賦詩日知獨
以詩規諫焉詩曰

所願斲思居者逸莫使將稱作者勞

郭震

宗元振武后與語奇之上寶劍篇詩曰

君不見昆吾鐵冶飛炎煙紅光紫氣俱赫然

席豫

字建侯帝登朝元閣賦詩羣臣屬和帝以豫詩最優

曰詩人之冠冕也

張說

字說之謫岳州而詩益悽惋人謂得江山助云

高適

字達夫年五十始為詩即工以氣質自高每一篇已好事者輒傳布

秦系

字公緒與劉長卿以詩相贈答權德輿長卿自以為五言長城系用偏攻之

王維

字摩詰別墅在輞川與裴迪遊其中賦詩相對為樂

詩曰

落日山水好漾舟信風奇

又詩

天寒遠山靜日暮長江急

又詩

日暮沙漠重戰聲煙塵裏

又詩

夙世吟詩客前身應畫師

鄭虔

嘗自寫其詩并畫以獻帝大書曰鄭虔三絕

孟浩然

字浩然王維私邀入內署玄宗問其詩浩然自誦所爲至不才明主弃之句帝曰卿不求仕而朕未嘗弃

卿柰何誣我因放還

詩曰

不才明主弃多病故人踈

又詩

衆山遙對酒孤嶼共題詩

又詩

日暮馬行疾荒城人住希

又詩

連天漠水廣孤客郢城歸

又詩

泊舟潯陽郭始見香爐峯

又詩

水落漁梁淺天寒夏澤深

又詩

荷風送香氣竹露滴清聲

又詩

微雲澹河漢踈雨滴梧桐

王昌齡

字少伯工詩緒密而思清詩曰

明堂坐天子月朔朝諸侯

又詩

不信沙場事君看刃箭瘢

韋渠牟

工詩李白異之獻七百字詩一章嘗著文筌寺十六韻

寶羣

字丹列昆弟皆工詩爲遊珠集行於時

劉太真

善屬文尤長於詩德宗宴曲江自爲詩羣臣皆和帝
自第之以太真等爲上

孟郊

字東野少隱於嵩山韓愈一見相與爲忘形友詩有
理致最爲愈所稱

李觀稱郊詩曰

高處在古無上平處二顧二陸

韓愈送郊序曰

東野始以詩鳴其高出晉魏

又薦士詩曰

有窮者孟郊受材實雄鶩

又詩曰

食齋腸亦苦強歌聲無歡出門如有礙誰爲天地寬
其窮也甚矣

賈島哀詩曰

身歿聲名在多應萬古傳

張籍

字文昌籍爲詩長於樂府多警句

張洎稱籍曰

李陵之後繼其善者唯公一人

白讀籍集曰

尤攻古樂府舉世少其倫

姚秘書讀籍詩曰

古風無敵手新語是人知

皇甫湜

字持正荅李生書曰

詩未有劉長卿一句已呼阮籍為老兵筆語未有駱賓王一字已罵宋玉為罪人此風俗偷薄

盧仝

號玉川子嘗為月蝕詩以譏切元和道黨愈稱其工

賈島

字閔仙初為浮屠名無本當其苦吟見京兆尹跨驢
小避呼詰之乃得釋

詩曰

鳥從井口出人自岳陽來

韓文公贈島詩曰

孟郊死葬北邙山日月風雲得暫閑天恐文章聲斷絕再生賈島在人間

島吟病蟬詩

折翼猶能薄酸吟尚極清

方干寄島詩曰

莫問吟詩苦年年芳草平

程錡有詩悼之曰

騎驢衝太尹奮卷忤宣宗

張籍贈島詩曰

姓名不上登科記身屈惟應內史知

劉文

能爲歌詩步歸韓愈作水柱雪車二詩出盧仝集右

陳明道云

劉生一生只有兩事作水柱雪車二詩以遂身後之名取韓愈金以濟生前之困可謂簡而當也

張建封

字本立貞元中賦朝天行以獻
綏陽帝賦以餞又自作詩以自警

權德輿美之曰

公歌詩特優有仲尼之魚質

杜牧

字牧之於詩情致豪邁人號爲小杜以別杜甫

詩曰

家在城南杜曲傍兩枝仙桂一時芳禪師都未知名
姓始覺禪門氣味長

在司徒座上有詩曰

華堂今日綺筵開誰喚分司御史來忽發狂言驚滿
座兩行紅粉一齊回

登科後狎游有詩曰

落魄江湖載酒行楚腰纖細掌中情三年一覺揚州
夢贏得青樓薄倖名

崔咸

字重易游終南山乘月吟嘯至感慨泣下諸文中唯

歌詩最善焉

李益

於詩尤長每一篇成樂工爭以賂求取之被聲歌供奉至征人早行等篇天下皆施之圖繪

歌曰

回樂峰前沙似雪受降城上月如霜

陳學士吟窓雜錄卷二十三

陳學士吟窓雜錄卷二十四

歷代吟譜

唐

李賀

字長吉賦詩自曰曰高軒過其勁句曰

殿前作賦聲摩空筆補造化天無功

每旦騎弱馬從小奚奴背古錦囊遇所得書投囊中

辭尚奇詭所得皆驚邁絕去翰墨畦逕當時無能效

者深為韓文公所知

杜牧之稱之曰

長吉歌詩雲煙線聯不足為其態也水之迢迢不足為其情也春之盎盎不足為其和也秋之明潔不足

爲其格也風檣陣馬不足爲其勇也瓦棺篆鼎不足爲其古也時花美女不足爲其色也荒園陔歛梗莽丘隴不足爲其恨怨悲愁也鯨吞鰲擲牛鬼蛇神不爲其虛荒誕幻也蓋騷之苗裔理雖不及辭或過之

李義山曰

長吉將死忽見一緋人曰帝成白玉樓立召君作記天上差樂不苦也氣絕聞有行車嚙管之聲

陸暢

字達夫作蜀道易辭

有和對雪詩曰

天人寧底巧剪水作花飛

又山齋翫月詩曰

野性平生惟好月
新晴半夜覩嬋娟

又經崔諫議林亭

蟬噪入雲樹
風開無主花

柳公權

字懸誠從幸未央宮
帝曰朕有一喜邊戍賜久不時
令中春而衣已足當賀我以詩應聲而成曰

去歲雖無戰今年未得歸
皇恩何以報春日得春衣
帝甚悅曰子建七步爾乃三馬
文宗召與聯句帝曰
人皆苦炎熱我愛夏日長
公權屬曰

薰風自南來殿閣生微涼

帝以爲辭意皆足命題於殿壁

撫言曰

武宗復召一宮人謂公權曰朕惟此人若得學士一篇富釋然矣公權曰

不念前時忤主恩已耳寂寞守長門今朝却得君王顧重入椒房拭淚痕

姚合

善詩世號姚武功

李頰

字德新其屬辭於詩尤長姚合名爲詩士多歸重頰走千里丐其品合大如獎挹以女妻之

頰獻詩於錢尚父曰

只將五箇字用破一生心

錢曰可肯七心

王績

字元功著書自號東臯子或經過酒肆往往題壁作詩爲好事者諷

蔡允恭

工爲詩煬帝有所賦必令諷誦

崔湜

字澄瀾三十八執政暮出端門緩轡諷詩張說見之歎曰文與位固可致其年不可及也

蘇味道

九歲能屬辭與李嶠俱以文翰顯時號蘇李

李嶠

字巨山夢人遺雙筆自是有文辭爲文章宿老一時

學者取法焉

孟啓曰

元宗嘗乘月登勤政樓命梨園弟子歌數闕有唱李嶠詩者曰富貴榮華能幾時山川滿目淚沾衣不見祇今汾水上惟有年年秋鴈飛上春秋高問是誰作或對曰李嶠因嗚然涕下不終曲而起曰李嶠真才子

張鷟

字文成爲兒時夢紫文木鳥五色成文其大父曰鷟鷟也若壯殆以文章瑞朝廷乎遂命以名

員半千稱之曰

鷟文辭猶青銅錢萬選萬中時號青錢學士

閻朝隱

字友倩，屬辭音詭，爲武后所賞。

富嘉謨

時天下文章尚徐庾，浮俚獨嘉謨。與吳少微本經術，雅厚雄邁，人爭慕之，號吳富體。

崔融

字安成，爲文華婉。武后哀冊，最高麗絕筆而死。時謂苦思神竭云。

李泌

字長源，尤工詩。有建寧王哀詞二首，末句云：

良弓摧折久，誰識是龍韜。

薛稷

字嗣通以詞章名

子美有詩美之曰

惜哉功名忤但見書畫傳

張九齡

字子壽張說一見曰詞人之冠也

孟啓曰

公與李林甫同列度其巧譎為海燕詩曰
無心與物競鷹隼莫相猜終亦退斥

蘇環

字昌容拜相封許國公

蘇迥

字廷夫封許與張說以文章顯故號燕許大手筆

開元遺事曰

長安春時盛於遊賞故題待制詩曰
飛埃結紅霧遊蓋披青雲

崔宗之

與李白杜甫以文相知者

武平一

名甄中宗時雖宴豫嘗因詩頌規誠然不能卓然自
引去故彼謫謫而名不衰

蕭嵩

十七年為中書令時海內少事帝賜羣臣十日一宴
蕭嵩會百官賦詩俾孫逖序之

蘇源明

字號夫工文辭有名有小洞庭歌首曰

小洞庭兮字方舟風嫋嫋兮離平流

李適之

初在相賦詩曰

朱門長不閉親友恣相過年今將半百不樂便如何

及罷相又賦詩曰

避賢初罷相樂聖且銜盃為問門前客今朝幾箇來

賀知章

字季真累祕書監天寶初夢將帝居數日寤乃請為

道士詔從之

還鄉有詩二絕

其一

離別家鄉歲月多近
水春風不減舊時波

事半消磨唯有門前鏡湖

其二

幼小離家老大回鄉音難改面毛衰家童相見不相
識却問客從何處來

薛令之

福州長溪人時爲東宮官僚以詩題於公宇曰
飯澁匙難滑羨稀筋易寬

明皇見之判曰

若嫌松桂寒任逐桑榆暖

令之謝病謝詔以長溪歲賦資之

李邕

字泰和既冠見李嶠自言讀書未徧一見秘書嶠曰
秘閣萬卷豈時日能習耶邕固請乃假真秘書未幾
辭去嶠驚試問與篇隱帙了辯如響嶠歎曰子且名
家負謗而死子美爲作八哀詩讀者傷之

徐楚璧

尤善五言詩有詩曰

峴山思駐馬漢水憶迴舟

又詩

暮雨衣猶濕春風帆正開

王翰

字子明少豪健及進士第然喜蒲酒

獨狐及

字至之其爲文長於議論

蕭穎士

字茂挺四歲能屬文時號蕭夫子卒門謚文元先生

蕭存

字伯誠韓愈少爲存所知及存死有詩曰
中郎有女能傳業伯道無兒可保家

崔顥

第進士有文無行有塞垣詩曰

錯落金鎖甲蒙茸貂鼠衣

孔巢父

字弱翁隱徂徠山

杜子美以詩贈之曰

巢父掉頭不肯住東將入海隨煙霧

吳筠

字正節所善孔巢父李白歌詩略相甲乙

孫逖

年十五見崔日用令賦土火爐援筆成篇理趣不凡
日用駭歎遂與定交

元結

事元德秀楊浚見其文曰一第涵子耳

皇甫冉

獨孤窓公曰冉詩天資獨得非師資所獎

李華

字遐叔為弔古戰場文取重於時

李觀

字元賓屬文不旁沿前人時謂與韓愈相上下

戴叔倫

字幼公師事蕭穎士為門人之冠

陸贄

字敬輿中博學宏辭入翰林少以材幸天子嘗以輩行呼而不名

包融

與儲光義等十八人皆有詩名

詩曰

春夢隨我心搖揚逐君去

又詩

荒臺森荆杞朦朧無上語

殷璠稱之曰融詩青幽語奇頗多剪刻

包何

字幼嗣與佶齊名世稱二包

包佶

字幼正有對酒贈故人詩口

扶起離披菊霜寒喜重開

陸羽

字鴻漸隱苕溪自稱桑苎翁少事竟陵禪師後師沒
羽作詩寄情其略曰

不羨白玉盃不羨黃金壘千羨萬羨西江水曾向竟

陵城下來

顏真卿

字清臣文十五卷詩十八首

令狐楚

五歲能爲辭章元和中爲相

武元衡

字伯蒼工五言詩好事者傳之往往被於管絃

柳宗元

字子厚做離騷數十篇讀者咸悲惻

孟簡

字幾道尤工詩

陸龜蒙

字魯望居松江甫里多所論撰升舟設蓬席齋書茶

竈筆林釣具往來時謂江湖散人或號天隨子甫里先生自比涪翁江上丈人

撫言曰

詩篇清麗與皮日休爲唱和之友

吳子華奠文曰

大風吹海海波淪漣涵爲子文無隅無邊

楊憑

字虛受善文詞

陳學士吟窓雜錄卷二十四

陳學士吟窓雜錄卷二十五

歷代吟詩

唐

歐陽詹

字行周舉進士與韓愈等皆天下選時號龍虎榜閩人舉進士自詹始其文章切深回復明辨與愈友善

楊敬之

字茂先贈項斯詩曰

度度見詩詩摠好及觀標格過於詩平生不解藏人善到處逢人說項斯

項斯

字子迂爲會昌丹徒尉

李戡

字定臣嘗惡元和有元白詩多纖艷不逞乃集詩人之類大古者斷為唐詩以譏正其失

楊汝士

中進士第終刑部尚書

據言曰

楊嗣復開宴汝士有詩曰

文章舊價留鸞掖桃李新陰在鯉庭

歸謂其子曰今日壓倒元白

裴度

字中立治第東都號綠野堂與白居易劉禹錫為文章出討淮西過女几山下詩曰

待平賊壘報天子莫指仙山示武夫

王播

字明敷題木蘭院詩二首

其一

二十年前此院遊木蘭花發院新修而今再到經行處樹老無花僧白頭

其二

上堂已了各西東慙愧開梨飯後鍾二十年來塵撲面如今始得碧紗籠

李德裕

子又饒善爲文章貶朱崖有詩曰文帝寵深陪雉尾武皇恩宴龍津

到朱崖有詩曰

青山似欲留人住百匝千遭遇郡城

公好闢孤寒之語後之文場困辱者思公有詩曰
八百孤寒齊下淚一時回首望崖州

鄭繁

字蘊武詩語俳諧有詩與人別云

惟有兩行公廨淚一齊酒向渡頭風

世號鄭五歇後體

又有詩贈老僧曰

凍瓶粘柱礎宿火焰爐灰

韓偓

字致堯謫官入閩有詩曰

謀身拙爲安蛇足報國危曾捋虎鬚

鄭畋

字台文有馬嵬佛堂詩曰

肅宗迴馬楊妃死雲雨雖亡日月新終是聖朝天子
事景陽宮井是何人

觀者以爲真輔相之句後果大拜

又題王子晉廟詩

曉花珠弄藥春辛王生苗楚妓紅絲瑟秦郎白管簫
衣從星渚浣丹就日官燒

議者以爲當在李杜之次

李商隱

字義山楊文公曰道中偶得玉溪詩百餘篇意其愛

之曲盡萬態之變精索群言之要使學者少窺其一
斑略得其餘光若滌腸而換骨矣

有詩詠賈誼曰

可憐夜半虛前席不問蒼生問鬼神

又有詩曰

珠箔輕明覆玉墀披香新殿鬪腰肢不須看盡魚龍
戲終遺君王怒偃師

唐彥謙

宗茂業有詩數百篇薛廷珪爲之序號鹿門先生集
行於世

温廷筠

與李商隱俱有詩名號温李

謫方城有詩曰

侯印不能封李廣別人丘隴似天山

據言曰

廷筠以文爲貨識者鄙之及謫士人以詩送之唯紀唐夫詩得其尤其詩曰

鳳凰詔下雖沾命鸚鵡才高却累身

孫光憲曰

廷筠作賦凡八义手而八韻成

李義山曰

近得一聯云遠比邵公三十六年宰相未得偶温曰何不云近同郭令二十四考中書管宗嘗賦詩上句有金步搖未能對遺示及第進士對廷筠以玉條脫

續宣宗嘗又以藥有白頭翁廷筠以蒼耳子對

段成式

字柯古多奇篇秘籍出意造雲藍紙

吳融

字子華力學富詞調

高駢

字千里鎮蜀一日聞奏樂聲知有改移乃題風箏詩曰
夜靜絃聲響碧空宮商信任往來風依稀似曲纔堪
聽又被風吹別調中不日移渚宮

詠懷詩

手持金鉞冷身掛鐵衣寒

題二女廟詩

當時珠淚滴多少直到如今竹尚斑

詠雪詩

逡巡好上高樓望蓋盡人間惡路歧

聽歌詩

公子數歡月滿樓桂人禍調唱伊州便從席上秋風起直到蕭關水盡頭

寄僧筇竹杖詩

堅輕筇竹枝一枝有九節寄與沃州僧閑步秋山月駢歌妓詩

酒滿金樽花滿枝雙蛾齊唱鷓鴣詞清聲揭入雲間去駐得春風花落遲

羅紹威

字端已每宴會勸貧伏賦詩

嘗有公謫詩曰

簾前淡泊雲頭日座上蕭騷兩脚風

李景讓

字後已西川節度將伸登庸景讓曰不能伏事斯人
遂託疾離鎮有詩曰

成都十萬戶拋若一鴻毛

顧況

字逋翁有詩名

皇甫湜羨之曰

得於逸歌長句若穿天心出月脇意外驚人
常所及最爲快也

孫光憲曰

况老喪子有詩曰

老人喪愛子曰暮泣成血老人年七十不作多時別
見在冥間聞想亦甚悲憶

遂以情告冥官再於况家三歲能言其
事即非熊也

顧非熊

况之子也三十年場屋長慶中上恠榜無非熊名令
有司追榜劉得仁以詩賀之曰

愚爲童稚時已鮮念君詩及得高科晚須逢聖主知

孔紹安

以文辭稱侍宴賦石榴辭曰

紙爲來時晚開花不及春

劉希夷

字延之詞調哀苦爲時所重

張諤美之曰

文超情外理窮智表

劉夢得曰希夷詩云

年年歲歲花相似歲歲年年人不同

其舅宋之問苦愛此兩句懇乞許而不與之問怒以土袋壓殺之宋不得其死天報之也

董思恭

與杜正倫論文曰今日覺吾文頓進

李澄之

善為五言詩

李巨川

字下已為楊守亮記室軍敗被縛在途題詩於樹葉以遺華帥韓建建為釋縛

李拯

字昌時為翰林學士望南山而吟曰紫宸朝罷綴鸞鸞丹鳳樓前駐馬看唯有絲燕山色在晴明依舊似長安吟已淚下

畢誠

博通經史尤能歌詩

孫處玄

善屬文有詩曰

殘花與露落墜葉隨風翻

又詩

日側南澗幽風凝北林暮

又詩

漢家輕壯士無狀殺彭王一遇風塵起令誰守四方

賀蘭進明

有古詩八十首行路難五百並多新意

王灣

游吳中作江南意詩曰

海日生殘夜江春入舊年

又搥衣篇詩曰

月華照杵空隨月風響傳砧不到君

劉長卿

字文房范攄曰前有沈宋王杜後有錢卽劉李

王泠然

有詩贈愛子協律曰

官徵思倚玉文淺怯投珠

李涉

為博士嘗適九江忽逢大舫劫掠其豪首曰若是李
博士不須剽他金帛但希一篇李乃贈之曰

暮雨瀟上江上春綠林豪客夜知聞他時不用相迴
避世上如今半是君

崔善為

累大理司農二卿

陳叔達

字子聰累禮部尚書

岑文本

字景仁善文辭

長孫无忌

字輔機累中書令

員半千

字榮期常以文雅粉澤吏事

徐彥伯

名洪七歲能為文

劉禕之

字希美少以文辭稱

賈曾

與蘇晉皆以文辭稱時號蘇賈

蘇晉

數歲知爲文

崔日用

累并州長史

韋安石

舉明經迁左丞

蕭至忠

譽聞當時爲中書令

盧藏用

字子潛隱終南少室二山召授左拾遺

姚崇

字元之好學累中書令

許景先

張說曰許舍人之文雖泛峻峯激流然辭旨豐美得中和之氣云

呂溫

字化光藻翰精富一時流輩推尚

韋夏卿

字雲客善文辭

柳公綽

字子寬爲文典正

鄭餘慶

字居業少善屬文

鄭綱

字文明善屬文

牛僧孺

字思黯工屬文

張又新

字孔昭善文辭

周墀

字德升屬辭高古

田游岩

入許由祠旁自號田東隣

顏師古

字籀少博覽善屬文

鄭谷

字守愚有曲江晚望詩曰

村南斜日閑回首一對鴛鴦浴渡頭

段贊善善畫因採谷春雪詩意寫之成圖持以贈谷
曲盡瀟湘之意谷以詩贈之曰

愛余風雪句幽絕寫漁蓑

陸希聲

楊文公美之曰

希聲以詩法授沙門晉光晉光入長安爲翰林供奉
希聲猶未達以詩寄之曰

寄言昔日不龜手應念江頭泝滌人

晉光感其言引薦貴倖後至宰相

翁承贊

楊文公曰

承贊以御史使福州至劍浦舊識僧亞齊留詩別曰
蕭蕭風雨建陽溪溪畔維舟見亞齊

許經邦

權文公曰

凡所賦詩皆意與境會踈導情性含寫飛動得之於
靜欲所趣皆遠

鄭良士

字君慶昭宗時獻詩五百篇

沈如筠

殷璠曰

如筠早歲馳聲白首一尉

如筠詩曰

綠蘿無冬春彩雲竟朝夕

又詩

嘶酸寒鴈斷浙瀝秋樹空

又詩

漁陽燕舊都美女花不如

陳學士吟窓雜錄卷二十五